

欽定剿平三省邪匪方略

欽定剿平三省邪匪方略正編卷二百十四

庚申年

十一月初六日

甲申

德楞泰勒保奏言竊

臣

等於

本月初七日行抵清花溪據報由陝竄來高家

營內顏楊二姓之賊自太平官渡灣被兵勇擊

退又從簡池壩闌入通江界內龍紹周與唐冉

餘孽俱由高頭壩折竄陝境老林維時太平境

內已無賊匪

臣

等查簡池壩距清花溪不過四

站自應就近分兵先往剿辦惟楚省折回之賊
在巫山大寧邊界遊奕若一入雲開向萬縣新
寧等處奔逸恐腹地又遭蹂躪是以商定臣德

楞泰卽赴簡池壩一路進剿臣勒保取道新開

遏賊西竄初十日臣德楞泰甫至通江竹峪關

探知賊聞大兵前來卽連夜奔回西鄉辛子山

旋據通巴一帶文武稟報陝境之賊又折回數

股經劉清徐廷銓等派令縣丞職銜劉炳從九品徐若瀛帶領壯勇五百名並前在鮮大川夥內投首之王登忠鞏貴趙思朝等十八人假扮教匪模樣初四日在通江縣芝坪地方適遇楊開甲之弟楊開第一股賊匪千餘人竄來王登忠等詐稱鮮大川餘黨被官兵衝散情願歸附同行楊開第令其暫紮邊營明日點驗劉炳等

恐被窺破卽於三更時先令王登忠等潛入賊營到處放火各壯勇齊聲吶喊直前衝殺黑夜中賊衆驚亂奔逃自相踐踏追殺五十餘里至烏林堦時已天明因賊匪遠颺不便再追統計殺死及跌斃賊三百餘名投出男婦周太鼎等一百三十七名口搶獲馬騾鎗礮刀矛旗幟甚多並據周太鼎等供稱楊開第尹老掌櫃俱受

傷棄馬而逃。僞先鋒杜星貴已被戮死。當卽指
認屍首屬實。又據署巴州田文煦稟報。初六日
有李炳陳朝觀股內分出賊匪至棗林地方。乘
夜摸樁經署州判羅德嚴把總陳安邦等帶領
兵勇堵截。密令前此投首之楊仕山鮮文屏等
帶人於四更時混入賊隊放火。賊衆驚潰。殺賊
三十七名。撲水淹斃十餘名。生擒耿貴等八名。

至七十五一路官兵於初五日抵南江范家山
探聞楊開第一股由陝竄來被通江壯勇擊敗
竄至關門子與辛聰齊國謨張添倫等股合夥
七十五卽連夜發兵進剿賊分兩路抗拒一在
溝內埋伏一在空山嶺山腰吶喊誘敵七十五
先派都司蒲佑盛等帶領兵勇進溝將伏賊搜
殺殲斃五六十人繼卽統領馬步隊搶上大嶺

追殺三十餘里至小寨地方共計殺死及滾斃
跌斃賊匪三百餘人生擒唐泳章等五十三名
餘向石觀壩竄去七十五又帶兵追躡十一日
戌刻抵麻柳灣賊在陳家峽屯紮相距不過十
餘里正擬五更發兵詎該匪等於二更後竟分
三路前來撲卡將鄉勇頭卡攻破又復圍擾副
將張良槐都司蒲佑盛營盤七十五卽帶兵奮

力轟擊斃賊五十餘名生擒十二名蒲佑盛左手雖受矛傷尙能悉力堵禦營卡得保無虞訊據活賊鍾治谷供稱係李炳與張添倫辛聰等商量如果此次偷營得手卽赴保寧一路欲過嘉陵江若不能得勝仍回陝西等語七十五於天明後發兵追剿賊衆捨命狂奔分作兩股竄逸一由大小壩竄入陝境一由西河口折赴通

江_臣德楞泰聞信後卽星夜馳往截擊十五日

抵平溪壩正遇李炳等一股賊探十餘騎奔來

一見官兵卽踉蹌折竄經賽冲阿阿穆勒塔率

領頭隊馬兵趕緊追逐箭斃三名生擒五名訊

知李炳等因廣元南江一路官兵堵剿嚴密不

能竄出保寧張辛等逆已回陝境該匪欲由通

江至巴州儀隴等處竄往順慶可圖掠食_臣德

楞泰卽由梓潼廟繞出賊前十八日辰刻至柳林溪正值賊匪竄至我兵迎頭截住賊匪見兵卽逃由兩河口撲水過河官兵亦卽跟蹤躡渡趕剿一百二十餘里直追至西鄉之石虎壩共計殲斃賊匪二百三四十名淹斃者亦多生擒曹繼開等一百十三名臣據稱鎗斃賊目楊總兵不知其名臣德楞泰本擬卽向陝境追去緣接

臣勒保知會楚來之賊已由開縣遁入太平楚

省旣無兵追來自應先顧其急且川北境內現

無賊匪當卽札會七十五令其在通南邊界扼

要暫紮探明何處賊來卽赴何處截剿

臣

德楞

泰卽帶兵直趨於二十二日至八台山後槽地

方與勒保會合至

臣

勒保自清花溪分兵以後

十一日趕至新寧途次接據總兵永寧託雲泰

稟報湯思蛟劉朝選等所剩三百餘人遁入老
林由紅池壩至南天門一帶竄遁該鎮等追至
核桃壩據報後路徐家壩有楚省竄來大夥匪
衆恐腹背受敵卽帶兵轉回初三日巳刻至徐
家壩匪衆正在起營該鎮等卽分兵兩路追襲
殺賊一百三四十名生擒李潮元等三十五名
訊係黃白藍三號及樊人傑一股合夥竄回惟

線字號張姓賊目一股被馬兵衝斷未來該鎮等正在追趕之次又據大寧場鹽大使米喬齡專差前來告急附近鹽場之舌條嶺隘口有賊一股由楚竄至經都司沙念聖帶兵擊退賊又從西溪河竄來距場不遠必欲暫請赴場截剿該鎮等以大寧鹽場烟火萬家未被賊擾今賊竄將近未便置之不顧當卽密派叅將田朝貴

馬應國抽帶兵勇千名在百六溪硎口埋伏賊
果由此竄入我兵鎗石並發斃賊七八十名餘
衆驚退卽由界嶺折回永寧等仍卽帶兵西來
追剿樊逆等夥之賊查該匪等自大寧尖山壩
竄出沙沱子經雲陽開縣兩處團勇截殺殲獲
二三十人至十餘人不等復由羊子嶺大梁等
處竄出十二日至開縣之大旺山正欲從臨江

市奔竄新寧至梁墊一帶滋擾適遇

臣

勒保帶

兵趕到賊卽連夜由燈草壩竄入東鄉之土黃壩我兵卽取道普光寺迎截賊又折竄太平輾轉奔逃十九日永寧託雲泰之兵適由溫湯井

一路來至白沙河

臣

勒保亦到該處探知賊在

天池壩屯紮卽連夜分兵三路進剿該匪等恃其人衆直前抵拒官兵左右衝擊相持兩時之

久鎗箭所到斃賊六七十名並射死執旗賊目
一名賊始潰遁俱奔上八台山我兵乘勝追殺
直至後槽地方沿途殺死賊匪二百餘名生擒
廖貴等一百零四名訊據供稱白號樊人傑王
谷賢黃號徐萬富藍號王士虎並線字號張元
帥不知其名自到湖北去後在遠安地方與李
大人官兵打仗得勝原想到荆襄一路因聞湖

北新到馬兵利害不敢下去就在遠安竹谿房
縣一帶摸樁擄人在上龕地方忽被馬兵趕來
衝殺樊人傑等卽連夜逃至川境惟線字號衝
斷未來樊人傑等商量本要由新寧梁山一路
下壩過嘉陵江因到開縣觀音山聞大兵從新
寧前來就翻山過東太境內躲避等語當將從
賊日久之張有旺等六十八名卽行正法餘俱

被擄訊明釋放並據署城口主簿張雲漢稟報
張子聰之分股餘匪李德先從陝西敗回圍攻
楊家寨經該主簿督率團勇擊退擒獲僞總兵
汪固嘉次日追剿在三聖寨夾溝埋伏斃賊六
七十人奪獲馬牛十八頭匹又徐添德一股自
南溪竄入川境疊次攻撲城口之太和寨並經
該處團勇竭力抵禦鎗斃賊匪多名仍竄過陝

西漳河地方臣勒保因八台山之賊旣竄後槽

其勢非奔開縣卽走城口正擬進兵追剿間臣

德楞泰趕到接據探報徐添德苟文明等有由

漁渡霸竄入太平之勢正可合力馳擊又據夔

州文武稟報自楚竄來後股線字號賊匪已從

大昌竄入雲陽沙沱子地方勢必又至開境臣

等現在商酌如果此股亦由太平竄來正可聚

而殲洗若西竄新寧必須分兵截擊斷不使該
匪又入川東再擾腹地致有蔓延上煩

慈厯

德楞泰又奏言竊

臣

於竹峪關營次奉到十月

初一日

諭旨跪誦之下敬畏悚懼不能自己伏念臣自統兵

剿賊以來未能迅奏膚功撫衷循省負咎實深

刻下軍務情形本無掣肘之事又安有窒礙難言之隱乃荷

淵懷垂詢飭令據實呈陳

臣

益不禁欽佩感服之至

查川楚陝三省賊匪奔竄靡常自夏秋以來經各路官兵悉力殲除十去六七此時股數雖多但俱係敗殘餘孽勢皆窮蹙臣早與額勒登保札商自以全數逼入川境爲正辦現在楚境之

賊俱已入川該省業經無賊正須全力責以堵

禦臣已飛咨姜晟妥什布務於川陝交界地方

扼要嚴防毋任東竄至陝境卽日肅清之後想

額勒登保自必將該省守禦事宜布置周密再

行來川督辦維時川境又添各路征兵專司剿

辦更易爲力查刻下川省現有征防兵勇共二

萬餘名出敵者祇有萬餘昨接額勒登保咨會

將阿哈保一路現帶官兵二千有奇撥令回川
並挑撥甘肅營馬數百匹前來足資濟用况陝
楚賊匪既須全逼入川是陝楚兩省重在堵而
不在剿川省重在剿而不在堵且查自廣元以
至巫山凡與陝楚交界之處綿亘三千餘里本
不能處處設防多則徒費兵力少則更不濟事
惟嘉陵江西岸必須添設兵勇遏其西竄至

臣

現與勒保在太平一帶籌剿川東邊界之賊恐
該匪等被剿情急又復東竄官兵勢難抄前迎
截查明亮一路之兵現奉

諭旨飭令赴川協剿刻下尙未入境自係該省防堵

事宜尙須會同料理臣現已咨會先將前撥李

紹祖帶去兵勇三千餘名撥出派員由大寧一

路管帶前來卽可就近迎截惟念陝楚之賊分

通入川陝楚之兵均必跟蹤追剿餉糧亟須豫
籌查川省糧運事宜辦理本覺安速現經勒保
督率州縣臺站源源儲備並於各寨碉堡爲存
貯官兵隨到隨供從無缺悞卽或深入老林寨
洞希少不能處處充盈尙可設法籌辦惟餉銀
缺乏時形掣肘刻下川省軍需除兵勇月餉運
糧腳價等項之外實無絲毫浮費但需用旣多

勢難拖欠現聞司庫並無存銀先經勒保奏請
賞撥自邀

聖慈鑒察第念此後賊聚於川大兵雲集萬一用餉
不敷當此功虧一簣之時未免可慮緣蒙

垂詢用敢據實直陳臣具有天良惟知勉力帶兵殺

賊現與額勒登保交相勗勉儘力將川陝境內
之賊務於年內將大局辦完卽有一二未盡餘

氛尙須搜捕並酌辦善後等事總當於明春趕赴

闕廷瞻覲

天顏斷不敢稍有遷延自取咎戾均奏入

上命軍機大臣傳諭德楞泰勒保曰德楞泰勒保一路軍營二十日來未見報到本日遞到六百里奏報係於十月初四日發摺後直至二十三日始行

拜發前後實逾二旬且摺內所稱情形不過將楊
開甲餘黨等股夥匪藏擒多名仍未能辦完一大
股殄除一首逆而德楞泰所帶之兵亦未與賊接
仗並無可慰朕懷之處何必遲延多日始爲此奏
此二十晝夜焦急之懷實難言喻據稱德楞泰由
簡池壩一路進剿勒保由新開一路進剿伊二人
分辦之處朕早已料及但旣經分路剿辦何難各

行具奏乃必俟伊二人會合後始行聯銜奏報以
至遲延二十日之久不特朕朝夕盼望殷切卽內
外廷臣亦俱傳爲詫異况本年春間有賊匪偷渡
嘉陵江之事今德楞泰等奏報遲遲未至更易啟
猜疑伊二人何不曉事若此至摺內所稱各路兵
勇分投堵剿陝楚竄來匪衆不令闌入腹地並咨
會姜晟倭什布等於川陝交界扼要嚴防及嘉陵

江添設兵勇遏賊西竄所辦俱是但德楞泰等既
知與額勒登保札商將賊匪逼入川境爲正辦何
以張辛等逆又令其竄回陝境耶又所稱陝楚兩
省重在堵而不在剿所論甚是至川省重在剿而
不在堵之語尙未盡善川省各股竄匪自應痛加
剿殺但亦須邊界要隘防堵嚴密賊匪無從竄近
腹地漸逼漸緊方可剷除淨盡豈可令其在川境

散漫是川省固重在剿而亦兼在堵摺內已用硃
筆改正又另摺陳奏感悚情形多係無謂空言支
吾塞責德楞泰等既知感恩圖報伊等受朕之恩
尙淺受

皇考之恩甚重若不迅奏膚功使朕不能早慰

皇考在天之靈朕卽爲不孝德楞泰勒保尤爲不忠定
難辭罪至德楞泰現係一等子爵較伊原得封爵

已復其舊若遽心存自畫或以爲卽奮勉圖功亦未必再邀異數此則非是若德楞泰果能於年內迅掃賊氛必當加恩進爵倘辦理遲延不但伊現在子爵不能保全必當治以貽誤之罪至勒保則係屢經獲咎之人尤當倍加懲奮伊等總須時時以殺賊立功爲急全不在鋪叙感恩悚懼之詞試思朕之所以加恩訓飭者豈徒欲伊等以虛詞覆

奏耶至經畧剿盡高二馬五自當帶兵入川此時
德楞泰等惟應併力一心無分畛域設法將賊匪
逼歸一處庶可收事半功倍之效再摺內稱陝境
折回之賊經縣丞職銜劉炳從九品職銜徐若瀛
帶領鄉勇並投首之王登忠等假扮教匪歸附賊
營又署州判羅德嚴把總陳安邦等帶領投首之
楊仕山鮮文屏等混入賊隊俱設計放火使賊匪

驚潰奔竄痛加殲戮此等機宜在投首之人尙能
設計誘賊何官兵計不出此况賊匪見官兵追剿
自必先行逃竄若僅事追逐徒勞無益必須設計
掩襲使賊匪猝不及防無從豫遁方可聚而殲洗
劉炳徐若瀛羅德嚴陳安邦張雲漢及投出之楊
仕山鮮文屏王登忠等誘賊出力著德楞泰先行
存記俟再有出力卽行奏請加恩至都司蒲佑盛

帶兵擊賊殲斃多名及至受矛傷尙能奮勇堵禦
不令衝破營卡甚爲出力著以應陞之缺陞用至
川省軍餉又已撥給成功在卽軍需自較增添朕
必當豫爲籌計不待伊等奏請但須撙節支用不
可稍有糜費亦不得過事苛刻致兵丁多有苦累
並著遵照前旨將剿賊情形隨時具奏以慰廑注

同日陸有仁奏言

臣

自省起程由棧道馳進經

過寶雞之東河橋黃牛舖鳳縣之草涼驛留壩
之南星廟臺子等處向來俱係熱鬧村鎮今盡
成瓦礫之場幸賊匪現已遠竄麥田又均經播
種出土青慈民心尙屬安帖

臣

於途間接據洋

縣稟報伍懷志零匪一股由鰲屋小牛嶺竄至
該縣屬之華陽地方總兵穆克登布等帶兵兜
剿又沔縣稟報自川折回賊匪一股約七八百

人由寧羌西流河竄入沔縣之黃草坪老林內
總兵楊奎猷帶兵搜剿又南鄭縣稟報賊匪一
小股由城固五郎竄至該縣回軍壩距府城九
十里督臣長麟帶兵馳至漢中卽赴牟家坪一
帶堵剿又東路探報紫陽賊匪由許家河自連
橋一帶奔竄其安康香河賊匪由平利之泗郎
廟東奔漸近縣城又高二馬五股匪自楚省邊

界折回由洵陽竄至安康之蔣家河距興安郡城八十里各等因

臣

查核所報情形洋縣華陽

之賊本只數百人日來勢更窮蹙穆克登布等各路兵勇足敷剿辦其沔縣南鄭之賊亦俱係殘敗餘匪長麟帶兵旣到漢中督剿總兵楊奎猷又在沔縣截擊且恒瑞慶成又在西鄉之鍾家溝關東山等處分布官兵嚴密堵截其勢斷

不能肆竄惟紫陽平利安康之賊人數稍多高二馬五又係著名首逆情形較爲著重聞經畧額勒登保已至紫陽之斑鳩關切近川界得信後自必折回督同楊遇春慶溥溫承惠等剿辦此時在陝之賊俱已漸近川界而在川之賊經德楞泰勒保帶兵緊躡追剿亦俱逼近陝境其楚省邊界之賊又經折回安康經畧大兵自應

留陝先將安康等處之賊以次殲除再移近川
界與德楞泰等隨地通知兩面夾擊似更易於
得手

臣

現卽馳抵漢中一面趕緊督運糧餉源

源接濟務俾士飽馬騰兵氣益增勇銳一面先
與長麟慶成會籌一切倘額勒登保大營移近
仍當馳往熟商總期和衷共濟早靖逆氛奏入

上命軍機大臣傳諭陸有仁呂洋縣沔縣等處敗殘

餘匪有長麟穆克登布等帶兵剿辦自必刻就殲
除其竄入紫陽一帶之首逆高二馬五於賊股中
最爲狡悍經官兵疊次痛殲勢已日見窮蹙又有
額勒登保統領重兵由紫陽截剿而長麟辦竣沔
南零星賊匪卽可與經畧會合剿辦似亦無難克
期蕲事現在一切軍火糧餉最爲緊要前已降旨
令山東江西共撥銀五十萬兩迅速解往昨據惠

齡奏東省所撥銀兩業已分起赴陝自足敷用若
日內額勒登保將高馬等股殲擒卽移師赴川則
陝省存兵較前減少軍需自可大加節省倘該處
因防堵未能全撤以及善後事宜尙有需用之處
朕當酌量情形隨時接濟不待該撫奏請卽行撥
給該撫務當督率屬員妥爲經理不可稍有虛糜
仍當於撙節之中俾軍營供支毫無闕乏方爲妥

善

同日

上諭內閣曰陝西扶風鳳翔等處本年秋收歉薄曾經降旨加恩賑卹至岐山一縣地界毗連且爲棧道往來大路曾有團勇防堵之事聞秋收亦屬歉薄自當一律矜恤著將該縣本年應徵錢糧一併緩至來年麥秋後征收

初七日

乙酉

慶成奏言竊

臣

接護撫篆後因分防

各兵尙未抽調到齊卽在西鄉督催各路糧餉
并籌辦防堵章程查西鄉東南扼要地方原擬
總兵胡定泰汪啟駐紮王黑壩分截川匪折竄
之路此時汪啟因伍逆後股餘匪尙在終南山
竄匿該鎮尙在石泉一帶堵截胡定泰在黃官
嶺檄調尙未到來因連接稟報川省各匪經德

楞泰勒保督兵剿急分投折竄陝境盡入西鄉

東南邊界臣連夜趕回西鄉適副都統阿哈保

接經畧札調帶兵入川由西鄉南路前往正可

沿途迎擊但東南山徑叢雜賊匪往往此截彼

竄東南王黑壩一帶原擬防堵之總兵等均未

帶兵到來現有叅將海洪阿奮勇出衆已奉經

畧題補副將臣隨奏齊兵勇三千名派該將管

領由東路進發與阿哈保均於本月二十三日
起程兩路並進以壯聲勢今該將至五塊石王
黑壩地方適中扼要先行安設營卡以便胡定
泰到彼統率堵剿詎海洪阿等於二十四日行
抵馬家灣地方卽遇川省折回之賊接仗施放
鎗礮自卯至申屢次衝壓殺死賊匪甚多并礮
斃偽元帥朱朝閣忽後股賊匪踵至敗匪退而

復同海洪阿身先兵勇奮力衝殺深入賊隊衆
寡不敵受傷陣亡守備穆克登布猝被戕害弁
兵亦有傷亡兵勇力單均據守山梁民寨該匪
等尙四面攻圍臣聞信卽連夜抽帶馬步兵勇
馳往接應適副都統綸布春患病在西鄉調養
漸愈一同前往該匪等知有援兵前去膽敢前
來迎敵二十五日行抵板橋垭土地嶺一帶卽

遇該匪等蜂擁而來搖旗吶喊兇悍異常臣親

率兵勇搶上山梁鎗礮並施馬隊由道上衝壓

自辰至未賊數次撲上皆被我兵擊退猶敢公

然抵敵臣自帶數人首先直衝賊隊綸布春同

遊擊吳亨衍分帶兵勇從旁抄擊賊衆始慌亂

敗退我兵乘勢追殺刀矛並舉先後殺賊二百

餘名賊匪由漢溪河原路奔竄兵勇追殺三十

餘里又殺賊一百餘人生擒活賊李華等傍晚
兵勇少息連夜鼓勵跟蹤向南緊追中途據差
探回報兩股賊匪一股由馬家灣原路奔逃一
股於四更時向北折竄白沔峽係走瓦脊溝七
里壩江岸之路臣伏思一月以前伍逆餘匪會
已偷渡刻下江水涸淺更甚處處可涉雖有卡
勇防堵甚不足恃當卽帶兵折轉抄截行至瓦

脊溝地方該匪果突衝卡勇正在涉淺洶渡猝

見官兵趕至紛紛亂奔

臣

與綸布春各帶馬隊

分投剿殺登時將南岸未渡之賊盡行殲斃其

洶至江中身帶鎗箭之賊淹斃尤多

臣

等復帶

領馬兵過江跟追三十餘里又殺賊一百餘名

生擒活賊二十七名餘匪數百人紛紛向東奔

散訊據獲賊供稱此股賊目係冉學勝與川楚

擊散各股零匪合夥有三千餘人連被官兵剿
殺昨日打散各自奔逃冉學勝帶數百人半夜
折回北竄又一股仍由原路回川等語所獲之
賊均係強壯戰手立即正法查瓦脊溝七里壩
西通洋縣東接石泉俱可竄入南山總兵江啟
近在石泉之銀杏壩一帶堵截臣飛咨該鎮先
卽帶兵探迎此股截剿臣剿賊途次又連接漁

渡營稟報賊匪由木竹河竄至平西山入七里溝又另股賊匪由五塊石至麻柳灘又西鄉稟報賊匪苟鮮王徐等逆自漁渡壩至毛堽塘紫陽稟報龍逆一股由鐵板溪向北奔竄入西鄉之小河口此時東南一帶據報北竄入陝股數較多阿哈保所帶兵力不過截剿一路西鄉東南道路紛歧萬分喫緊之際防堵大局未定該

處現無大員臣若徑往追剿此股賊匪恐由川

折回各股匪徒復尋前蹤北竄是以先令汪啟

就近截剿且毋庸前來西鄉總兵穆克登布亦

在南山剿捕伍逆餘孽卽此起偷渡殘匪竄往

合夥兵力亦數剿洗臣復與長麟札商趕緊於

陝甘防兵內酌抽精壯者另派幹練將領馳往

協剿期以迅速殲除聞撫臣陸有仁月內可抵

漢中因將巡撫關防文案於二十九日委遊擊

韋洪齋送府城候交

臣

現在先分探各股折回

竄匪何股賊蹤較近卽奮力迎頭堵截斷不使

復由前蹤北遁至此次分股賊匪自瓦脊溝偷

渡之處因防兵陸續未齊先儘分撥東南堵剿

之兵尙未於該處安設營卡

臣

剿賊到彼乃知

係劉之仁關騰等分防之所不及祇有本地鄉

勇不足抵禦以致該匪踴淺偷渡實屬疎漏愧

悚無地

臣

仰蒙

天恩棄瑕錄用

特命辦理防堵事宜未能籌及於前斷不敢事後隱

飾諉卸惟乞

聖明將

臣

嚴加治罪以爲疎防者戒奏入

上命軍機大臣傳諭額勒登保慶成曰川省賊匪經

德楞泰勒保追剿緊急分投折竄陝境慶成派海
洪河與阿哈保帶兵分路並進扼要堵剿海洪阿
因衆寡不敵受傷陣亡慶成卽抽帶馬步兵勇馳
往接應在板櫟埡土地嶺一帶遇賊接仗殲賊三
百餘名生擒一百五十餘名賊匪一股由馬家灣
原路奔逃一股向北折竄白河峽慶成復帶兵抄
截於瓦脊溝見賊匪涉淺淌渡漢江將南岸未渡

之賊盡行殲斃過江跟追又殺賊一百餘名此股
北竄賊匪經慶成訊據獲犯供稱係賊目冉學勝
其自瓦脊溝偷渡因防兵陸續未齊先儘分撥東
南堵剿之兵尙未於該處安設營卡爲劉之仁關
騰等分防之所不及伊二人尙無大過慶成則係
額勒登保奏明派令總統防堵之人不能先事豫
籌致任賊匪蹈淺偷渡究屬疎防其自請嚴加治

罪本所應得姑念慶成此次殲賊多名餘匪偷渡之處防兵未集祇有本地鄉勇不足堵禦尙非有心玩悞免其治罪仍著傳旨嚴行申飭卽責令慶成戴罪立功自贖督飭汪啟穆克登布等將此股竄匪卽在陝境辦竣勿令再折回川至額勒登保前奏稱陝楚肅清後卽當整旅入蜀今冉學勝一股旣折竄漢江以北而苟鮮王徐等逆又自漁渡

霸竄至毛塢塘龍逆一股由鐵板溪竄入西鄉之
小河口是川匪各股又折入陝境額勒登保此時
仍當在陝督剿不可遽往川省現在西鄉東南並
無大員防堵最關緊要且瓦脊溝等處西通洋縣
東接石泉俱可竄入南山慶成現已札會汪啟帶
兵迎截而穆克登布亦在南山剿捕伍逆餘匪可
以就近截擊額勒登保再當嚴行督催務將陝境

各股竄匪迅速殲除不得再有遲緩況冉學勝剿
敗餘匪不過數百人卽與伍逆合夥亦祇千餘人
而穆克登布一路兵勇共有七千餘名又有汪啟
帶兵前往以數倍賊匪之兵力擊此敗竄之賊何
難速行撲滅現在慶成札商長麟於甘省防兵內
酌抽精兵派員帶領馳往協剿究恐緩不濟急額
勒登保前所稱防兵三萬究在何處應卽扼要防

堵其竄川之賊專交慶成督令防江各員嚴密堵
剿倘再令竄入陝境必當從重治罪决不寬貸所
有殺賊陣亡之副將海洪阿守備穆克登布俱著

咨部賜卹

欽定剿平三省邪匪方略正編卷二百十五

庚申年

十一月初八日

丙戌

倭什布奏言查高二馬五六

股賊衆經

臣

等在濫水痛剿後卽亡命逃竄由

楊家牌樓小文峪河魯家坡等處直向西南奔

竄沿途搜獲程志興等十四名僉供高馬二掌

櫃因陝省兵多又擄不出糧石繞到湖北不料

馬兵利害連次擊敗前日在濫水地方被官兵

殺死許多矛子手後面追兵又緊是以不敢行走大路連夜翻山緊走我等因黑夜落後想等官兵過去再走等供查該犯等係積年猾賊當

卽一併正法

臣

與明亮籌商該匪翻山亂竄若

不分路兜攔不能痛加剿戮適接長齡來咨已

帶兵抄往鮑家店一帶迎頭截剿東北二面既

有鎮臣德昌在黃泥灘帶兵堵禦又有長齡統

境當卽提訊楊中林等供稱此股賊匪係高家
營高二掌櫃帶領只有一千五六百人怕與官
兵打仗聞得高三馬五已到湖北所以趕來找
尋合夥營中還有管事楊元帥袁元帥俱不知
名字昨夜被官兵衝散營盤不知去向我等是
矛子手等供當將該犯楊中林等三十一名均
卽正法其餘廖新客等十六名訊係被擄未久

概予寧釋查此股賊匪經官兵擊敗現由七里
關一帶遁回陝省相隔不遠勢必歸併合夥適
接長齡咨會已帶兵由東北赴界外截剿臣等
乘勝由西南進逼二十五日起至陝省銅錢關
飛咨長齡夾擊合攻趁此賊氛殘敗趕緊會剿
集事以冀少慰

聖鑒再臣遵

旨傳諭明亮據明亮望

闕免冠碰頭並稱明亮係滿洲世僕受

恩至重乃福薄糊塗謬存在楚顧楚之愚見未將兩

起賊衆緊追赴陝夾擊今蒙

聖訓嚴明惶悚愧悔無地自容復蒙

天高地厚之恩不卽從重治罪

賞給藍翎侍衛

宥過生成惟有竭此血誠隨同長齡認真堵剿以冀
稍贖前愆等情伏查明亮凡遇打仗殺賊從不
稍留餘力其兩次不行出境追剿因顧楚心殷
以致錯謬非敢有心取巧今蒙

皇上格外施恩明亮實知愧知懼理合據情代謝

天恩奏入

上命軍機大臣傳諭倭什布曰高二馬五在賊首中

最爲兇悍可惡今馬五股中復有高三附入必須
迅速搜捕此次倭什布等所辦尙好該逆等旣經
同竄陝境自必歸併合夥現在長齡已帶兵由東
北追剿倭什布等由西南進逼正可兩面夾擊痛
加殲戮倭什布等務須倍加奮勉協力會剿若能
將此二股賊匪在陝楚交界搜捕淨盡殲擒賊首
卽係伊等之功朕必加之重賞一俟此二股竄匪

辦竣倭什布係湖北巡撫應帶領廣東廣西之兵
仍回楚省邊境督率防堵其馬隊官兵皆係吉林
黑龍江勁旅自不應置之閒地專爲堵禦之用此
時川匪竄入陝省者股數較多需兵協剿明亮應
卽帶領馬隊並侍衛富翰等與長齡同赴陝省聽
候經畧調度至明亮本係

皇考所遺宿將是以朕疊加委任卽累獲愆尤朕猶屢

行寬貸非不欲加意保全如果此後知感知懼痛
改前非帶兵奮勉立功自効朕仍當加之重賞若
始終蒼狷性成復蹈故轍朕亦豈能以伊係舊人
曾著微績遂廢

祖宗之國法耶著倭什布面行傳知明亮看伊此後之
福分如何耳

初九日

丁亥

上命軍機大臣傳諭長麟陸有仁慶成曰剿辦教匪大局總宜將各股賊匪逼入川省則賊勢不能散漫官兵得以併力剿辦年來朕與在廷諸臣均持此議蓋川省辦理團勇築堡等事極爲認真該處民人同心禦賊實能踴躍急公是以辦理較易卽該省民人忿賊日久亦深願賊匪竄入川境後可以痛加剿殺近日額勒登保德楞泰奏到之摺其

大意亦思逼賊入川乃各股竄匪皆不肯在川境屯集卽被官兵逼剿緊急折而入川亦不過暫時躲避旋即竄回就目前情形而論賊總在陝境爲多可見川省團練認真爲賊人所畏憚而陝省地方則民心散懈於團勇築堡等事不能實力奉行任賊來往自如總由地方官不能善爲勸諭督率辦理以致賊來多有裹脅而守禦事宜全屬有名

無實似此相率玩愒堵剿焉能得力朕思百姓之
久經從賊怙惡不悛者固無足惜至良善之民亟
應力爲保護俾各安生業不致去而從賊則安一
民卽少一賊數年來剿辦賊匪總爲安民人情孰
不愛生惡死彼去而從賊亦非得已皆由貪生耳
日見百姓流離朕所刻不能忍者該督撫不可不
仰體朕意也卽如陝省之龐洪勝本係南山內居

住平民並非賊黨前次一聞賊匪將至轉燒燬房
屋甘心投入賊黨亦由地方官平日不能安輯所
致著長麟陸有仁督飭親民之吏實心實力綏撫
良民務令得所卽曾經被賊裹脅悔罪投出者亦
當加意撫恤以期民心日固衆志成城賊匪之勢
日孤無從搶掠亦必凍餓自斃其鄉勇中有能禦
賊出力者卽當奏明獎擢若臨陣捐軀則更當倍

加賞恤俾共知鼓勵至於地方州縣果有盡心民
事者必當據實保奏候朕加恩若不肖劣員則嚴
行叅劾治以應得之罪不可稍存姑息庶地方官
及鄉勇等共知激勸不致仍前弛懈卽現在川省
地方亦豈盡皆賢員惟在鼓舞作興則人思盡力
該督撫又不可因有此旨將平口心喜之人率行
保奏冒濫邀功而實在出力者轉不知所勸勉至

川陝交界處所山嶺叢雜道路綿長豈能處處安
兵設卡卽闢築堡寨該省力有不能且現在大功
將次告成亦緩不濟急然賊匪經由熟路必有險
隘地方可以扼禦此事專責成慶成會同長麟督
辦總須就該省現有兵勇擇要防守以剿爲堵則
賊匪自不能闌入現在川省竄匪雖有數股折竄
陝境但俱係敗竄餘匪陝省兵勇現有數萬何難

奮力截剿慶成惟當督率將弁上緊兜擊將賊匪
逼入川境並於漢江南岸嚴密佈置不使賊匪一
名得以偷渡若再疎於防範致令賊匪踰淺渡江
必將伊等從重治罪決不寬貸慶成等一悞不可
再悞也再教匪自滋事以來焚掠村莊並不蓄意
佔據城池蓋緣賊匪慮及據守城池轉被官兵圍
困不能四散竄逃是以不敢擾及而府州縣等知

賊匪向無攻擾城池之事往往一聞匪衆竄入境
內藉守禦爲名卽將城門關閉任聽賊匪在城外
四鄉焚燬房屋擄掠人畜並不督率兵勇前往救
援使村民橫遭荼毒殊堪憫惻况城外鎮市邨莊
多有人烟稠密之處其富商大戶較之城內居民
或有更爲殷實者若楚之樊城陝之龍駒寨蜀之
太和鎮皆非城內而被賊殘害皆朕子民地方官

不爲保護賊匪豈不肆掠而去總緣府州縣等以城池失守律有明條而殘熾郵莊向不追問遂視同膜外置之不顧試思城外郵民偶有盜劫之事該管官尙有應得處分何況遭賊焚掠其失於防範之罪尙可恕乎著長麟陞有仁嚴飭地方文武各員毋論城內城外均須認真防守如果有親率兵勇出城奮力堵賊不使滋擾郵莊俾居民得以

安堵無虞卽將該地方官據實保奏朕必優加獎
擢倘一聞賊至心存畏怯仍前閉城自守致賊匪
將城外郵莊肆行蹂躪必當查出指名嚴叅治罪
用示勸懲

臣等謹案邪匪滋事有年其伎倆總在不據
城池惟向鎮市劫聚潛伺劫掠一遇官兵圍
躡卽復鼠竄狼奔是以不能聚而殲旃剿捕

稍稽實由於此我

皇上軫恤創痍如傷在抱

籌諮指示所以保衛民生者無所不至而小醜一日

未靖卽

聖心一日不寧此次因陝境賊匪較多以良民之去

而從賊皆由於愛生惡死之心

申諭該省大吏善爲撫綏鼓勵鄉民實力捍禦其有

邨莊被害者責成地方官設法堵擊程以功
罪此卽堅壁清野之法所以決勝千里者蓋
皆

昏謨之廣運不疾而速也

初十日
戊子

上諭內閣曰昨據額勒登保奏將營內殺出之張效
元解京審訊據供於本年三月間同李廣榮袁有

得王應惠等攜帶銀兩前赴喀什噶爾地方探望
邪教遣犯王發生該犯等行至肅州地方換票原
籍印票祇有李廣榮袁有得王應惠三人張效元
因票內無名嘉峪關盤查嚴緊該犯不能私自出
口從肅州折回蘭州到韓家店地方投入王廷詔
賊營嗣見王廷詔一股賊匪到處殺人放火肆行
掠食該犯曾向王廷詔勸令投首或可免死王廷

詔不依張效元害怕反悔逃出賊營至經畧軍營
投首當經降旨令保寧等截拏出口之李廣榮等
三犯審明具奏今據保寧奏將李廣榮袁有得王
應惠三犯拏獲錄取供詞呈覽朕詳加披閱該犯
等所供情節與張效元供詞均各相同惟該犯等
供係張效元之父張全使令伊等前往探望一節
張效元前此未經供出當經提訊張效元亦據該

犯供認不諱是張效元一犯本係習教之人聽從
伊父携銀欲往新疆探望同教匪徒因不能出口
折回投入王廷詔賊營種種不安本分實有應得
之罪但朕節經降旨從前曾經習教而並未從賊
者卽與齊民無異概免查辦若糾衆謀逆抗拒官
兵卽當一律剪除罪在不赦其自賊營投出者亦
無不一體妥爲安置今張效元雖經習教因在王

廷詔賊營內見賊兇橫其心害怕反悔投誠尙知
畏法稍有一綫可原張效元一犯着加恩釋放交
該部行文順天府派委妥員解至直隸所有經過
地方一體派員小心接遞至安徽省交與荆道乾
督同藩臬兩司將伊父張全傳到向其明白宣諭
以張全令伊子私自潛往新疆探望教匪王發生
本屬不法今因伊子張效元尙知畏懼從賊營內

投出不特伊子免罪卽張全應得罪名一併加恩
寬免令張全將張效元領回俾伊父子團聚嗣後
務須安靜守法各務農業毋許再有滋事如該犯
等不知悛改仍前糾約同教互相傳習煽惑愚民
一經發覺必當加倍嚴懲決不姑寬

臣等謹案邪教之說託於荒誕不經鄉曲愚

民往往爲所煽誘迨至同教倡亂之後自知

滿被爲難甚至甘心陷於罪辟亦在所不免

我

皇上俯鑒氓蚩前於捕獲劉之協時

特降諭旨誅叛逆而不誅邪教固已使無知被誘之
人知所感畏而悔悟矣茲因張效元一犯雖
經習教而投至賊營旋知逃出首罪仰蒙

聖主格外施仁貰回原籍並將其父罪名一體宥免

咸與維新此雖庶頑讒說有不洗心而革面
者哉

十三日辛卯額勒登保奏言竊臣由磚坪蘭河口

一帶前進於上月二十五日趕抵平利之白土
關查高馬股匪前由鮑家店逃竄經長齡帶兵
截剿雖未深入楚境尙在竹谿白河界內游奕
而龍紹周苟文明等股竄至安康平利地界楊

遇春溫承惠分路帶兵城轉截剿隨時擒斬賊
匪或數十人或一二百人不等總遏其東趨之
路該匪向西逃往滔河一帶二十二日師次豐
口壩又探有賊匪一股竄至長沙鋪亦欲向白
土關東竄楊遇春等聞信連夜督兵由羅河
抄出賊前二十三日天明時前隊探信兵勇甫
到白土關遇見賊探七八騎經兵勇等擒獲四

人訊稱此股卽係徐添德與前由石泉過江南
竄之伍逆餘黨曾芝秀等數百人在洋溪河合
夥因川陝艱於擄食官兵又緊追勦殺故繞向
東北要過白土關仍赴湖北等供楊遇春以該
匪旣知我兵在前攔截未必肯由此路前來勢
必折向碾盤石壩河遶向東北而竄遂知會溫
承惠酌帶鄉勇於白土關山梁施放鎗礮故作

聲勢楊遇春格布舍豐紳各率侍衛將領帶馬
步兵勇由嚮潭河孟溪溝老虎溝長岡嶺分投
抄出午後先後趕到壩河果見該匪結隊竄來
楊遇春等率兵迎擊該匪始猶抗拒後見我兵
勢猛卽折回奔竄我軍乘勢追殺四十餘里斃
賊三百數十名箭斃偽副元帥陳添保生擒探
馬頭莫榮周志林等六名散賊二百六十四名

餘賊向清潭溝逃竄查清潭溝路通金河仁河
皆係入楚之路次日五更仍帶官兵赴董家梁
抄截約行二十餘里至廣木溝又有賊匪自連
綫河竄來楊遇春與格布舍豐紳分路進溝截
殺該匪糾衆搖旗吶喊自嶺下壓我兵奮力攻
擊斃賊二百餘人生擒賊匪一百餘名內有賊
曰黃國忠等五名又自行散出就近被擄民人

一百餘名訊知此係前由高家營內分出與戴家營合竄之賊自西鄉地界被官兵剿潰之後近日又與戴家營分夥由涓河一帶潛遁意欲尋高馬二逆同竄湖北等語格布舍豐紳仍帶兵跟蹤搜剿前進沿途搜殺賊匪又有百餘名

臣查詢情形如此旋據楊遇春報到亦屬相同

查賊匪總在陝楚邊境奔逃臣若徑尋蹤進剿

竊恐該匪聞風疾走轉致逼令東趨必須帶兵

前往竹谿竹山由東北遶向西南迎剿較易得

手遂酌留總兵喜明帶領兵勇在白土關暫駐

以資控扼

臣

抽帶馬步兵勇二千餘名卽取道

關坵入楚由竹谿周家灣安和塘一帶前進沿

途察探高馬各股賊匪正往東來

臣

由得勝舖

文谿河趕緊督兵冒雪前進一面札知長齡由

吉陽關抄出白河順水寺先於東面遏截賊竄

鮑家店之路

臣

於初二日翻界嶺晚間進抵燕

家扒探得賊匪從茅坪竄來相距四十餘里適

在迎頭遂詢明道路初三日四更時令札克塔

爾率同福忠阿副將陳尙德劉瑞百祥等帶步

隊由山梁進發

臣

率同安福捫欽保墨新王兆

夢張元麒烏爾希訥等帶領馬隊由溝內進發

已刻至棗樹嶺坡下遙望見賊匪蟻聚各山頭
已有準備而山勢又極高峻隨督飭官兵併力
上攻乃旁路又有賊匪下山冀繞出我軍之後

臣亟令官兵分路抵禦正在攻擊間札克塔爾

亦帶領步兵順山到來一齊攻撲侍衛安福福
忠阿捫欽保墨新副將王兆夢叅將百祥遊擊
高萬春哈國瓏等帶領兵勇鼓勇而進鎗箭所

發斃賊紛紛遊擊哈國瓏躍馬衝入賊隊猝受
矛傷數處陣亡官兵人人憤恨進攻愈力搶上

山梁刀矛並舉斃賊三百餘名賊匪潰竄

臣督

飭官兵併力壓下適楊遇春格布舍慶溥等亦

由旁路之大山廟安家莊茅坪一帶追賊前來

遂與之合力趕擊沿山追逐四五十里天色已

晚卽傳知楊遇春慶溥等不必合兵畧爲停息

仍奮力窮追次日遂趕至皮家河界牌山

臣

亦

率兵由大雙河歇馬廠趕剿途間均有斬獲計

兩日共斃賊四百餘名先後生擒四百七十餘

名內訊出賊目董大位吳有法探馬頭饒成王

自強等十七名供稱此數股係高三馬五徐添

德王廷詔張賈元帥帶領陸續湊合乘此人衆

勢大要往湖北昨日被官兵趕殺我們不敢存

紮往前奔竄不料今日到茅坪來迎頭又遇官兵等語訊明後將從逆者正法被脅者釋放凡係賊目與探馬頭皆凌遲處死

臣

隨詢之楊遇

春格布舍慶溥等據稱日前該匪等先後竄合因聞白土關有兵一股轉向三岔河狗脊關一股又轉向磨溝其勢欲遠道潛遁楊遇春由四溝壩追勦慶溥由亂木壩趕赴觀音堂均由大

石板抄出初二日午後兩路官兵趕到姚家河
賊匪甫經竄過馬步官兵併力追逐賊匪知有
兵來齊上山坡拚命迎拒我兵數路仰攻奮力
競進擒斬共計二百餘人皆係精悍矛手賊匪
仍向東面茅坪遁去楊遇春等紮營萬山寨昨
早帶兵趕來聞有鎗礮之聲是以催兵從旁路
抄出等語該匪現向西南折竄洵陽界內查徐

添德及高馬等股或分或合到處牽綴我兵實
爲可恨今該匪等均欲合竄楚境臣帶兵適扼
其前永任東竄趁此賊匪折奔之時惟有督同
楊遇春慶溥等顧住東北趕緊向西勦辦並飛
札長齡一面搜捕零星餘匪前來以便調撥仰
仗

天威如於洵陽平利安康一帶勦除一二股實爲幸

甚否則亦必將該匪逼向川境大兵合擊以期
迅速集事至冉學勝張世龍賊匪昨經臣帶兵
在斑鳩關截擊後由鐵佛寺繞溪河竄往楊柳
樹泰山廟經額勒亨額於上月二十一二等日
帶兵截勦向西鄉地界竄去所有陝省西南一
帶防堵事宜長麟慶成現在會籌趕辦諒該匪
等不致蔓延至疊次打仗兵勇間有傷亡容另

查明咨部辦理

額勒登保又奏言竊查現在各股賊匪經大兵
隨處剿殺且因川陝辦理防堵及團勇結寨各
事均極周密賊匪艱於掠食均欲向楚境奔逃
查楚省房竹一帶疊嶂層山尙屬有險可扼至
均穀一帶則地勢平行益形散漫剿辦更形費
手臣實深焦慮是以此次親督官兵由二竹兜

向白河將賊匪逼向西南遁去第賊匪雖向西
南其蓄意實在東北是此時防剿事宜實關緊
要楚省邊境綿長在在與陝省接壤辦理亦非
易事_臣昨抵竹山之安和塘適倭什布明亮帶
兵至七里關銅錢關一帶堵截西北面長齡帶
兵由得勝舖分路探剿賊匪皆距_臣不遠長齡
明亮先後來營會晤明亮屢奉

嚴旨萬分惶懼

臣

已將防剿事宜與之講論倭什布

明亮日內定已趕緊籌辦至楚省現有官兵計

數已不爲少大員內有明亮德昌孫清元等帶

兵往來督率楚省民風強勁若再加以團練則

聲勢益壯倭什布係湖北巡撫呼應皆靈自可

就近督率各屬妥爲趕辦至

臣

連日親歷二竹

境內見民人寨落不如川陝之稠密自係賊匪

一向奔竄不能修築今賊已出境正當趁此時
辦理庶使百姓有以自衛賊匪不能肆其擄掠
卽可杜其窺伺再向來官兵所需糧餉每逢追
賊緊急亦有不繼之時此後官兵分段防堵鹽
糧亦須分路源源供給使之衣食有資方可以
得其心而用其力至長齡所帶兩粵官兵自應
留楚分佈防堵其馬隊皆係勁旅未便全留爲

防剿之用臣已札知長齡帶兵搜捕餘匪前來

俟到營後與之商定再行奏

聞奏入

上命軍機大臣傳諭額勒登保曰高馬股匪經長齡帶兵截剿在竹谿白河界內游奕龍苟等股竄至安康平利地界經楊遇春分路截擊已向西逃而徐添德一股又與伍逆餘黨會芝秀等合夥繞向

東北奔竄並有高家營內分出與戴家營合竄之
賊在西鄉剿敗後復與戴家營分夥由滔河一帶
潛遁欲尋高馬二逆同竄湖北雖經官兵分路追
剿殲戮多名但訊據賊目供稱高二馬五徐添德
王廷詔及張賈各賊目奏合匪徒欲乘此人衆勢
大前往湖北看其情形自因川省團勇築堡防堵
嚴密不敢竄入陝省又值收成歉薄難於掠食總

思乘間闖入湖北以圖延喘額勒登保抽帶馬步
兵勇入楚由竹谿一帶前進適扼其前並顧住東
北趕緊向西勦辦所見甚是而此時湖北堵禦尤
爲十分緊要額勒登保已與倭什布明亮會晤將
防守事宜面爲囑咐現又降旨諭令姜晟等督飭
各屬嚴密防範額勒登保務須乘各股賊匪潰敗
之時合力奮擊卽於陝楚之交勦除淨盡必不得

已亦應逼向川境以期大兵會剿於年內一律辦
竣迅速成功早來見朕切勿再有因循至再學勝
一股前據慶成奏該匪等由瓦脊溝偷渡折竄江
北今額勒登保摺內未據提及自係尙未得信冉
學勝剿敗餘匪不過數百人卽與伍逆合夥亦祇
千餘人慶成已札會江啟帶兵迎截穆克登布在
南山剿捕伍逆餘匪亦可就近截擊並有桑吉斯

塔爾緊躡追勦兵勇共有七千何以至今尙未勦
竣桑吉斯塔爾穆克登布汪啟等究在何處作何
勦辦或伊等三人惟恐此股賊匪勦淨後又當派
往別路勦賊卽心存觀望與賊日久相持俟各路
竄匪勦盡而伊等亦同時告竣此等軍營積習亦
難保其必無着額勒登保嚴行飭催令伊等三人
奮力擊勦尅期搜捕淨盡勿留餘孽倘竟有心延

玩卽行據實叅奏若剿捕不力或任賊匪竄入商
雒一帶則其罪更重必當按律懲辦決不寬貸再
恒瑞現在何處堵剿賊匪總未據提及從前恒瑞
奏報亦多粉飾或恒瑞染患疾病不能帶兵亦着
額勒登保查明恒瑞如一時未能就愈留住軍營
亦屬無益不妨據實奏明令其回至西安調養所
帶兵丁另行派人接管或卽交付慶成方可得力

至所奏長齡原帶兩粵兵丁應留楚分佈防堵一
節與朕前旨相符且前經降旨長齡令於剿淨高
馬二逆後卽赴經畧軍營聽候調度今各路竄匪
均欲合竄楚境長齡係宜昌鎮總兵自應在楚督
率防堵不宜遠離長齡所帶兵丁內吉林黑龍江
官兵俱係勁旅自當歸入經畧軍營以資剿捕其
兩粵官兵卽着長齡仍行帶領回至楚省邊界一

集賢堂詩集卷之三
帶擇要防堵不得稍有疎懈所有此次殺賊陣亡
之遊擊哈國瓏著咨部賜恤

上又命軍機大臣傳諭姜晟倭什布長齡曰現在楚
省賊匪皆已奔竄出境但陝省無食可掠又有經
畧在彼督辦而川省勦賊緊急地方辦理團勇築
堡等事亦皆認真楚省自邊界綿長在在與川陝接
壤此時各股賊匪節節官兵截擊逼向西南其意

總欲折回東北是楚省防堵事宜實關緊要况當
賊匪遠竄之時各處寨堡止可及時修補先事預
防姜晟倭什布身任地方定其專責長齡亦係本
省總兵現已諭知額勒登保將長齡所帶吉林黑
龍江勁旅令赴經畧軍營應用其兩粵官兵皆交
長齡帶回楚省會同倭什布孫清元德昌明亮等
擇要防堵楚省原有兵丁爲數已不爲少今又加

以兩粵官兵聲威更爲壯盛可以聯絡布置姜晟
等務須審度地勢於賊匪向來熟經之路扼要堵
禦毋令竄匪一名闖入至姜晟雖已調任直隸總
督但書麟尙未到任此時軍務地方皆仍係姜晟
之責倘存五口京兆之見有意觀望以致稍有疎
虞又令賊匪擾及楚境則仍准姜晟是問再湖北
所需餉銀本年由部庫及廣西河南先後撥往者

爲數將及百萬皆不待伊等奏請先行籌撥此時
該省辦理防堵事宜駐守官兵爲數尙多應用糧
餉亦須源源接濟該省原領餉銀若干其支用者
共計若干核之現在官兵所需是否尙足敷用亦
從未據該督撫奏及現據額勒登保奏該省每逢
追賊緊急糧餉有不繼之時是辦理已屬支絀或
伊等以現在經費浩繁強作解事不敢奏請殊不

知軍行餉隨必須士馬飽騰方足鼓其銳氣倘稍
形缺乏焉能實力禦賊是伊等所見者小而所悞
者大並著姜晟倭什布將現在餉銀所存實數是
否敷用抑或卽須接濟之處速行具奏另候籌撥
總期於事有益切莫鯁鯁過計錙銖較量也